

Cansoneta leu e plana

I

Cansoneta leu e plana,
leugereta, ses ufana,
farai, e de Mon Marques,
del traichor de Mataplana
q'es d'engan farsitz e ples. 5
*A, Marques, Marques, Marques,
d'engan etz farsitz e ples.*

II

Marques, ben aion las peiras
a Melgur depres Someiras,
on perdetz de las denz tres: 10
no i ten dan que las primeiras
i son e non paron ges.
A, Marques, Marques, Marques...

III

Del bratz no·us pretz una figa,
que cabreilla par de biga 15
e portatz lo mal estes;
ops i auria ortiga
qe·l nervi vos estendes.
A, Marques, Marques, Marques...

IV

Marques, qui en vos se fia 20
ni a amor ni paria;
gardar se deu totas ves
qon qe·z an; an de clar dia,
de nuoitx ab vos non an ges.
A, Marques, Marques, Marques... 25

V

Marques, ben es fols qui·s vana
c'ab vos tenga meliana
meins de brajas de cortves;
et anc fills de crestiana
pejor costuma non mes. 30
A, Marques, Marques, Marques...

Berguedà, Guillem de. *Antología de textos de Literaturas Románicas*. A cura de Victòria Cirlet. Universitat de Barcelona, Departament de Filologia Romànica, Barcelona, 1994, p. 166 i ss